



26. april 2022

UPA 2022/19

Kalaallit Nunaanni eqqartuussisarnermik inatsisip aamma naalagaaffimmi tjestemandit Kalaallit Nunaanniittut pillugit inatsisip allanngortinneqarnissaannik inatsisissatut siunnersuummut missingiutip (Pinerluttulerineri eqqartuussisarnermi digitalimik attaveqaatinik atuineq, suliassat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartussaaitaanerannut ukioritinneqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffisassaattut siunnersuut. (Aningaasaqarnermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siumup isumaa naappertorlugu inuiaat inatsisitigut illersugaanerisa qulakkeersimajuarnissaa pingaaruteqarluinnartuuvoq. Taamaammat Siumut eqqartuussiveqarnerup iluani pitsanngorsaanissanut eqaallisaanissanullu peqataassaaq, taamaaliornikkummi innuttaasut inatsisitigut illersugaaffeqarnerunissaannik sulineq naqissuserneqartussaammat.

Ilisimasatsituut Inatsisipinik atuutsitsinerimut oqartussaaffik Naalagaaffiup ataani suli inissisimavoq, taamaattumillu suliassanut taakkununga tunngatillugu allannguinnissamik imaluunniit ullutsinnut naleqqussaanissamik siunertaqartoqartillugu Naalagaaffeqatigiinnermi Oqartussaasut saaffigineqartarput suliakkerneqartarlutillu.

Aalajangiiffisassatullu siunnersuummut matumunga tunngatillugu taamatutaaq iliortoqarpoq, tassami siunnersuummi matumani anguniarneqartut qinigaaffiup siuliani aallartisarneqarnikuupput, ilaatigut Kalaallit Nunaanni Eqqartuussiveqarneq pillugu Siunnersuisoqatigiit innersuussuteqartarsimanerisa kingunerisaannik.

Naalakkersuisut matumani Eqqartuussisarnermik inatsimmi arlalinnik allannguuteqartitsinissaaq eqaallisaassuteqarnissarlu pillugit saqqummiussaanni qaqilerneqartut Siumumiit iluarisimaarpagut, taamaalillunimi pinerluttulerineri suliat ingerlasarnerisa naammassiuminarsarneqarnissaat qulakkeerniarneqarmat. Misilittakkammi amerlasuutigut aamma takutittarpaat pinerluttulerineri inatsimmi unioqqutitsinerpassuit ilaatigut suliassatut annertoorsuartut taaneqarsinnaanngikkaluit allaat sivoorsuarmik ingerlasinnaasartut, tamannalu illuatungeriinnut, tassalu pinerlineqartumut pinerliisumullu pilertornerusumik pitsaanerumillu atugassaqartitsinissaagaluanut kingunerlussinnaasarluni.

Misilittakkattaq aamma takutittarpaat pinerluuteqarsimasunut suliat eqqarsaatigalugit suliat kinguarsarneqarsinnaasartut unnerluunneqartup suliap inaarsarnerani takkutinngitsoornera takkussinnaajunnaarneraluunniit pissutigalugit, naak piumasaqaatit assigiinngitsut naammassineqareersimagaluartut. Tamanna piumasaqaatitalimmik piumasaqaatinillu atortikkuminartunik toqqammaveqarnikkut eqqartuussiviit suliamik naammassinissinnaalernissaat anguniarneqarmat Siumumiit iluarisimaarparput. Tamannalu periuseq inuinnaat saqitsaanneranni sulianut atugaasoq ajunngitsumik misilittagaqarfigineqartoq eqqarsaatigalugu Siumumiit immikkut taasaqarfigissallugu naleqquttutut isigaarput.



Suliassaqarfippassuit allat assigalugit digitalimik attaveqaatinik atuinissamik periarfissap eqqunniarneqarnera taamaattussaasariaqartutut isigalugu Siumumiit tapersiissuteqarpugut, taamatuttaaq Kalaallit Nunaanni Eqqartuussisoqarfimmi eqqartuussisut aammalu inatsisilerituut tjenenestemanditut sulisut 65-ileereeraangamik atuuffimminnit unittarnissaannik aalajangersagaq allanngorlugu ukiunut 70-inut periarfissiissuteqarniarneq Siumumiit taperserparputtaa.

Naggataatigut pinerluttulerinermi suliat eqqarsaatigalugit Siumumiit Naalakkersuisunut nassuiaassuteqarfigeqqussavarput matumani kalaallit danskillu eqqartuussisarnermik inatsisaasa assigiinnerulernissaannik anguniagaqarneq arlaatigut immikkut eqqummaariffeqarnissamik maluginiagassartaqarnersoq, tassani danskit pillaasarnermik inatsiseqarnerat aammalu nunatsinni pineqaatissiisarnermik inatsiseqarnerput eqqarsaatigalugit.

Siumumiit taamatut oqaaseqarluta siunnersuut aappassaaneerseqartinnani Inatsisinut ataatsimiititaliami suliarineqarluni pinissaa innersuussutigaarput.

Anders Olsen, Siumut.